

01/10.4/7589-09

2009-11-02

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ
ԱԶԳԱՅԻՆ ԺՈՂՈՎԻ ՆԱԽԱԳԱՀ

պարոն ՀՈՎԻԿ ԱԲՐԱՀԱՄՅԱՆԻՆ

Հարգելի պարոն Աբրահամյան

Ձեզ ենք ներկայացնում Հայաստանի Հանրապետության կառավարության եզրակացությունը Հայաստանի Հանրապետության Ազգային ժողովի պատգամավորներ Ռուզան Առաքելյանի, Արա Նոանյանի և Վահան Հավհաննիսյանի՝ օրենսդրական նախաձեռնության կարգով ներկայացրած «Հայաստանի Հանրապետության հողային օրենսգրքում լրացում կատարելու մասին» Հայաստանի Հանրապետության օրենքի նախագծի վերաբերյալ:

Նախագծի ընդհանուր գաղափարն ընդունելի է, սակայն դրան ուղղված լուծումները չափազանց խոցելի են ու համալիր վերանայման կարիք ունեն՝ ինչպես բովանդակային, այնպես էլ՝ իրավական տեխնիկայի առումով: Նախագծի առանցքային թերությունն այն է, որ դրանում բացարձակապես հաշվի չեն առնվել սահմանակից պետությունների օրենսդրական առանձնահատկությունները և իրականացվող քաղաքականությունը, փորձ չի արվել դրանց համարժեք հաշվառմամբ միայն առաջադրել իրավական լուծումներ: Մասնավորապես, համոզված ենք, որ, նմանաբնույթ նախաձեռնություններով հանդես գալիս, հարկ է համալիր վերլուծության առարկա դարձնել ինչպես Իրանի, Ադրբեջանի և Վրաստանի, այնպես էլ՝ Թուրքիայի հողային, քաղաքացիական, հարկային, մաքսային և տվյալ հարաբերություններին առնչվող ճյուղային օրենսդրությունը:

Բացի դրանից՝ առաջարկվող իրավական մոտեցումները բացարձակապես չեն կարող լուծել անվտանգության խնդիրները: Ավելին, դրանք առավել խոցելի են դարձնում նույն այդ խնդիրների լուծումը:

Ստորև ներկայացնում ենք այդ առնչությամբ մեր նկատառումները.

1. Նախ, նախագծում հստակ նշված չէ, թե խոսքը որ գույքի նկատմամբ սեփականության իրավունքի մասին է: Թերևս, կարելի է ենթադրել, որ այն վերաբերում է հողի նկատմամբ սեփականության իրավունքին, քանզի լրացումը կատարվում է Հայաստանի Հանրապետության հողային օրենսգրքի 4-րդ («Հողային հարաբերությունները») հոդվածում:

Սակայն առավել կարևոր է հետևյալ հարցադրումը. ինչո՞ւ է անվտանգության նկատառումներով սահմանափակվում սուկ սեփականության իրավունքը, ինչո՞ւ չեն սահմանափակվում նաև հողի նկատմամբ մյուս գույքային իրավունքները՝ օգտագործման, վարձակալության և այլն:

Իրավական համեմատության համար նկատենք, որ «Հողի ռեզիստրի մասին» Թուրքիայի Հանրապետության օրենքի 35-րդ հոդվածով Թուրքիայի ամբողջ տարածքում թեպետ սահմանափակված է միայն հողի նկատմամբ սեփականության իրավունքը, «Զինվորական փակ շրջանների և անվտանգության գոնաների մասին» օրենքի համաձայն՝ այսպես կոչված, փակ շրջաններում և անվտանգության գոտիներում օտարերկրյա ֆիզիկական և իրավաբանական անձանց առանց որևէ բացառության չի թույլատրվում ձեռք բերել հողի նկատմամբ ոչ միայն սեփականության, այլև՝ վարձակալության և օգտագործման իրավունք: Ընդ որում, այդ տարածքներում վաճառքը թույլատրվում է միայն Թուրքիայի քաղաքացիներին, այն էլ՝ հատուկ թույլտվության առկայության դեպքում:

2. Հարկ է նկատել, որ անվտանգության նկատառումներով պետք է սահմանափակել ոչ միայն հողի, այլև բնակելի տարածքների և այլ շինությունների նկատմամբ գույքային իրավունքները: Այս առումով նշենք նաև, որ շենքի կամ շինության նկատմամբ սեփական-

նության իրավունքի ձեռքբերումն ինքնըստինքյան հանգեցնում է ոչ միայն շենքի, շինության զբաղեցրած հողամասի մասի, այլև՝ հողամասի նկատմամբ այն իրավունքներին, որոնք անհրաժեշտ են շենքի, շինության օգտագործման ու սպասարկման համար (Հայաստանի Հանրապետության քաղաքացիական օրենսգրքի 209-րդ հոդված): Ի դեպ, նույնաբնույթ օրենսդրական դրույթ առկա է նաև «Հողի ռեգիստրի մասին» Թուրքիայի Հանրապետության օրենքում:

Ուստի, առաջարկվում է նույնաբնույթ սահմանափակումներ սահմանել նաև շենքերի և շինությունների նկատմամբ գույքային իրավունքների առնչությամբ:

3. Հարկ է հստակեցնել «սահմանամերձ շրջան» հասկացությունը և նախատեսել դրան համարժեք այլ հասկացության որոշման առավել տրամաբանական չափանիշներ: Բոլոր դեպքերում, սուկ սահմանից մինչև 25 կմ խորությամբ տարածքն ամբողջությամբ սահմանամերձ համարելը բավարար չափով հիմնավորված չէ. վերջին հաշվով, առավելությունը պետք է տրվի անվտանգության գոտուն, որի եզրային սահմանները կարող են միատեսակ չլինել և կախված լինել տվյալ տեղանքի առանձնահատկություններից: Պարզապես կարելի է նախագծում առաջարկվող տարածքում ժամանակավորապես կասեցնել հողահատկացումները՝ հետագայում խնդրին առավել հիմնավորված ու ծանրակշիռ փաստարկներով անդրադառնալու ակնկալիքով:

Այլ հասկացություն ասելով՝ նկատի ունենք անվտանգության գոտին, որը բնավ պարտադիր չէ, որ ներառի միայն սահմանամերձ տարածքները: «Անվտանգության գոտի» հասկացությունը գործնականում կարող է ներառել նաև երկրի ներսում գտնվող՝ հատուկ պաշտպանության կարիք ունեցող օբյեկտներին (օրինակ, պաշտպանության նշանակության օբյեկտներին, շենքերին և շինություններին, ատոմակայանին և այլն) հարող տարածքները:

Ավելին, օտարերկրյա քաղաքացիների համար կարող են սահմանափակումներ նախատեսվել ոչ միայն հիշյալ անվտանգության գոտիներում, այլև՝ Հայաստանի Հանրապետության ամբողջ տարածքում: Այս դեպքում կարող ենք հղում կատարել Հայաստանի

Հանրապետության Սահմանադրության 43-րդ հոդվածի դրույթներին: Ի դեպ, այսպիսի սահմանափակումներ նախատեսված են ոչ միայն մեր հարևան երկրներում, այլև՝ Արևմտյան Եվրոպայի երկրներում:

4. Հարկ է նկատի ունենալ, որ նշված խնդրի լուծումը չի կարող համալիր իրականացվել սոսկ Հայաստանի Հանրապետության հողային օրենսգրքի 4-րդ հոդվածում մասնակի լրացում կատարելով: Ավելին, միայն այդ հոդվածում լրացում կատարելը կարող է հանգեցնել տվյալ օրենսդրական ակտում անհարկի ներքին հակասությունների: Մասնավորապես, դա վերաբերում է նշված օրենսգրքի 76-րդ հոդվածին, որի 4-րդ մասի 3-րդ կետի համաձայն՝ պետության և համայնքների սեփականությունը հանդիսացող հողամասերը վարձակալության կամ կառուցապատման իրավունքով տրամադրվում են օտարերկրյա քաղաքացիներին և քաղաքացիություն չունեցող անձանց, իսկ նույն մասի 4-րդ կետի համաձայն՝ նաև օտարերկրյա պետություններին և միջազգային կազմակերպություններին:

5. Կարծում ենք, որ սահմանափակումները պետք է լինեն կատեգորիկ, այլապես նախապայմանով սահմանափակումները խոցելի կդարձնեն Հայաստանի Հանրապետության կառավարության գործունեությունը: Եթե նույնիսկ հիմնավորված համարվի Հայաստանի Հանրապետության կառավարության կողմից թույլտվություն տալը, ապա դա կարող է լինել միայն բացառիկ դեպքերում, որոնք հստակ պետք է սահմանվեն օրենքով:

6. Նկատի ունենալով այն հանգամանքը, որ արդեն իսկ ներկայումս համալիր կերպով ուսումնասիրվում է հատկապես Թուրքիայի օրենսդրությունը, նպատակահարմար է պարզապես ժամանակավորապես դադարեցնել օտարերկրացիների կողմից անշարժ գույքի ձեռքբերումը Հայաստանի Հանրապետության տարածքում, իսկ բացառիկ դեպքերում թույլտվություն տալու իրավասությունը վերապահել Հայաստանի Հանրապետության կառավարությանը: Միաժամանակ, հարկ է սեղմ ժամկետում ավարտել Հայաստանի Հանրապետության կառավարության կողմից նախատեսված քայլերը՝

ուղղված նշված ու նույնաբնույթ այլ հարաբերությունների իրավական կարգավորման աշխատանքներին, և կազմակերպել հանրային լայն քննարկումներ:

Ելնելով շարադրվածից՝ Հայաստանի Հանրապետության կառավարությունը պատրաստակամ է մեկ անգամ ևս քննարկել նախագիծը, եթե հեղինակները՝

1) ներկայացնեն լրացուցիչ հիմնավորում երկրի անվտանգության և պաշտպանության հետ կապված վտանգների առկայության, ինչպես նաև նախագծի ընդունման դեպքում դրանց բացառման վերաբերյալ.

2) տան նախագծի տնտեսական և քաղաքական հետևանքների գնահատականը՝ հաշվի առնելով այն հանգամանքը, որ այսօր արդեն բազմաթիվ օտարերկրյա կազմակերպություններ (Ազգրակի պոնձամոլիթոնային կոմբինատ, Ռուսաստանի Դաշնության զորքերին տրամադրված հողեր) գտնվում են տվյալ գոտում.

3) կհիմնավորեն, որ նախագիծը բացառում է այն ռիսկերը, որոնք կարող են առաջանալ հողի վարձակալության և հողի անհատույց օգտագործման ժամանակ:

Միաժամանակ հայտնում ենք, որ, Հայաստանի Հանրապետության Ազգային ժողովում ներկայացված նախագիծը քննարկելիս, հարակից զեկուցմամբ հանդես կգա Հայաստանի Հանրապետության արդարադատության նախարար Գևորգ Դանիելյանը:

Հարգանքով՝

ՏԻԳՐԱՆ ՍԱՐԳՍՅԱՆ